

Mo thruaighe mar táid Gaoidhil!

[Thomas F. O’Rahilly: *Measgra Dánta* II, poem 54]

Fearflatha Ó Gnímh

1 Mo thruaighe mar táid Gaoidhil!
annamh intinn fhorbhaoilidh
ar an uair-se ag duine dhíobh,
a n-uaisle uile ar n-imshníomh.

2 Baramhail do-bearar dóibh -
fuidheall áir d’éis a ndíobhdhóidh,
'gá sníomh ó chróluighe a gcneadh,
nó is líon tóraithe ar dtilleadh.

3 Nó lucht báirce fár bhrúcht muir,
nó is drong fuair fios a saoghail,
nó is géill i ngéibheannaibh Gall
Éireannaigh fá fhéin eachtrann.

4 Tugsad a dtréine ar thaise,
tugsad maise ar mhíomhaise,
tugsad meanma ar mhaoith mheirtnigh,
laoich fheardha nách aithintir.

5 Atá brat ciach ós a gcionn
mhúchas glóir Ghaoidheal Éireann,
mar néall gceath ghrianbháitheas goil
do leath d’iarghnáicheas orthaibh.

6 Tarla ó Bhóinn go bruach Lighean
dligheadh is fhiú aindligheadh,
gur bhreath shaor le fianaimh Fáil
an riaghail chlaon do chongbháil.

7 Ní bhí ag mac ríogh ón riaghail
aire ar lúth eich óirshrianaigh,
nó ar sheilg oighe fá chíogh cnuic,
nó ar ghníomh soidhe nó seabhaic.

8 D’fhearaimh Fódla is fáth orchra, -
do threabhsad daimh dhanartha,
i n-áit graifne a ngroigheadh seang,
gach faithche um oirear Éireann.

9 Treóid Ghall i gcluintibh a gcean,
túir aolta i n-áit a bhfoirgneadh,
margaidh uatha in gach oirear,
cruacha ar ardaibh aonaigheadh.

10 Ní aithneann inis Logha
ní dá faithchibh fonnmhara,
cnuic dhlaoiréidhe i ndiaidh a n-air;
biaidh saoirÉire 'na Saxain.

11 Ní aithneann aicme Ghaoidheal
Banbha buime a macdhaoineadh,
's ní aithneann Éire iad soin;
tiad re chéile as a gcrothaibh.

12 Is í an drong dhligheas d'aithne
d'inis Chuinn is comhathghe;
ní Goill is aoighidh aca,
Gaoidhil 'na ndroing dheórata.

13 Do léig Éire an tonn trithe
d'iomchar fhoirne coigcríche;
arthrach Dhá Thí do tholladh,
sí i n-anchruth do fheadamar.

14 Mar thimcheallas tonn anfaidh
le stoirm laoi lucht caolarthraigh,
saithe Gall ar tí a dtiomchail,
muna dtí ann d'Éireannchaibh.

15 Bruid Bhalair go n-a bhráithribh
Tuatha Dé do dhíoláithrigh;
dar lat is neimhthreise a-niogh
na beithre-se Mac Mileadh.

16 Mar lucht Traoi ar n-a toghail
dá ndíchleith i ndíothrabhaibh,
fian Teamhra a-táid ó Thailtin;
a bhfaid sealbha seachaintir.

17 Cosmhail re Cloinn Isra-hél
thoir san Éighipt ar éidrén,
Mic Mhíleadh um Bhóinn a-bhus
ag síneadh dhóibh a ndúthchas.

18 Mar do bhí Magh Tuireadh Thuaidh
i ngeall mhic Céin an chéadair,
lá sgarthana re teidhm dtinn,
feidhm an athLogha ar Éirinn.

19 Ag sluagh Éireann an fheóir ghloin
truagh gan ionamhail Eachtoir
mic Prímh re pobal Saxon,
cogadh dhíbh go ndiongbhatsan.

20 Truagh, a Rí rátha nimhe,
do theacht dúinn ór ndaoirse-ne,
an t-athMhaoise nár fhéag ruinn,
tréad an chathchraoi-se Criomhthainn.

21 A Thrionnóid 'gá dtá an chumhacht,
an mbia an dream-sa ar deóradhacht
níos sia ó chathaoirlíos Cuinn,
nó an mbia an t-athaoibhneas againn?

22 Nó an dtiocfa is-teach ar thairngir
do shluagh Danar ndúraingidh
naomh fíréanghlan, fáidh ó gCuinn,
an prímhéarlámh cáidh Coluim?

23 Má thug an Deónaghadh dhi,
Saxa nua dan hainm Éire,
bheith re a linn-se i láimh bhiodhbhadh,
don innse is cáir ceileabhradh.

24 Muna gcuirid dóigh i nDia
síol Éibhir Sguit ón Sgithia,
a gclár foirne - gá dám dhó?-
ní clár d'oighre ná d'iarmhó.